

Powšitkowne WOZJEWJENJA

njedźelu, 8. junija 2014

Dla přirodneje katastrofy na Balkanje namoľwja TCM:

Potrjechenym powodźenja pomhać

Po wobydlersej wójnje před 20 lětami je nětko wulke powodźenje Balkan domapytało. Direktor Carity w Bani Luce w Bosniskej a Hercegowinje, dr. Miljenko Aničić, pisa w lisće, zo „móžeš wusutki powodźenja jeničce ze scěhami wójny přirunować“.

Towarstwo Cyrila a Metoda z.t. (TCM) chce ze swojej akciju „Łužica pomha“ rady potrjechenych w biskopstwje Banja Luka podpěrać, hdžež je hižo wokoło lěta 2000 pomhało. Dr. Aničić poby swjat-kownu pónđzlu 2001 na putnikowanju w Róžeńće.

Najskutkowniša je finacielna pomoc. By-li kóždy dorosceny katolski Serb jeničce dwaj euraj darił, by so wjace hač 10.000 eurow nahromadziło. Wězo je kóždy pozbudźeny, wjace dać. Darowanska kwitowanka wustaji so tym, kotřiž swoju poľnu adresu podadza. Dary přepokazać móža so na konto Cyrill-Methodius-Verein, kontowe čisło 828 23 66, BLZ 750 90 300 pola banki LIGA respektiwne IBAN DE65 750 90 300 000 828 23 66, BIC GENO DEF1 M05 pod heslom „Banja Luka“.

Młodostni, putnikujće do Róžanta!

Putnikowanje dekanatneje młodžiny k maćeri Božej z lipy do Róžanta budže njedźelu Swjateje Trojicy, 15. junija. Hesło lětušeho putnikowanja je „Telko je pućow – kotry mam wolić?“.

Młodžinska Boža mša započnje so w 10.30 hodž. w putniskej cyrkwi. Kemše wuhotuje młodžina Wotrowskeje wosady.

Po Božej mši změjemy zhromadny wobjed při cyrkwi. Z džaknym nyšporom w 12.30 hodž. zakónčimy putnikowanje.

Přińdźće tónraz prošu z holčim a hólčim banerom. K přihotej na putnikowanje dóstanje kóžda wosadna młodžina z Don Boskoweho domu drjewjanu taflu we wulkosci 70 x 50 centimetrow, k tomu žerdz a šrubaj. Taflu wuhotujće prošu po wašich předstawach z materialijemi, kotrež sej sami wuzwoliće, na temu: „Jězus praji: Ja sym puć.“ Hdyž je tafla hotowa, přišrubujće ju na žerdz a přinjesće ju prošu we wašim procesionje sobu na putniske kemše. Tafle maja so pozdžišo na Kukowskim hrodžišču postajić.

Dušepastyr młodžiny, farar Měrcin Deleńk

Narodninska party – K stoćinam zbóžneho Alojsa młodžinski festival

Sta młodostnych z Łužicy, wšeho biskopstwa, druhich dželow Němskeje a z Čěskeje kaž tež Pólskeje wočakuja so w Radworju spočatk julija. Z młodžinskim festivalom, kotryž zahaji so pjatk 4. julija, w 17 hodž., woswjeća tam 100. narodniny zbóžneho Alojsa Andrickeho. Hłowny organizator je nimo Radworskeje wosady franciskanski pater Paulus Maria Tautz, kotryž je hižo wjackróc we Łužicy pobył. Z poľnej zahoritoscju młodym ludžom wěru spřistupnja, wužijo k tomu mjez druhim hudźbu, kotraž młodostnych „ze stólca storhnje“. Tak poskići so na přěnim dnju po wječeri w 20 hodž. koncert z rockowymi skupinami z Jendźelskeje, Irskeje, Awstriskeje a Němskeje. Workshopy a koncert wočakuje młodostnych sobotu, 5. julija. Wječor přidruži so biskop Heiner Koch. Po Božej mši scěhuje „nightfever special“ a w poľnocy so narodninska torta nakraje. Nazajtra podadza so wšitcy do Róžanta na diecezanske putnikowanje. Přizjewić móža so zajimcy pod www.Alojs100.de.

Poswjećenje skulptury putnika a hudźbny nyšpor

Nowa postawa putnika budže njedźelu, 15. junija, w 15 hodź. w Chróśćicach před Gerdesec putniskej hospodu poswjećena. Po tym su hosćo na zahrodu putniskeje hospody k towaršliwej bjesadze při kofeju a tykancu přeprošeni. We 18 hodź. sčěhuje hudźbny nyšpor w Chróšćanskej cyrkwi. Spěwotwórča Stefanie Schwab z Würzburga poda koncert k temje „Spěwy za žiwjenski puć – z lochkosću a horliwosću“. Z tym chce swój džak za wšo, štož je sama po Ekumeniskim putniskim puću dobreho nazhonila, zwuraznić. Wšitcy su přeprošeni. Pjenjezy ze zběrki wužija so za zdźerženje a dalše wutworjenje Ekumeniskeho putniskeho puća, kiž je ze swojimi mnohimi małymi swójbnyimi hospodami po puću jónkrótny w Němskej.

Zetkanje Częstochofskich putnikow

Tež lětsa pozbudža farar Beno Jakubaš, so w serbskej skupinje na putnikowanje z Waršawy do Częstochowy podać. Hić smě kóždy sobu, kotryž je 18. žiwjenske lěto docpěł. Termin putnikowanja je wot 5. do 15. awgusta. Zajimcy njech so hač do njedźele, 29. junija, pola fararja Bena Jakubaša w Njebjelčicach přizjewja, telefonowe čisło (0 35 78) 30 20 05. Zetkanje wšitkich putnikow budže štwórtk, 3. julija, w 20 hodź. w Njebjelčicach na farje.

Putnikowanje młodžiny do Krupki

Młodostni wot 16 lět su přeprošeni, wot njedźele, 27. julija, hač do pjatka, 1. awgusta, do Krupki putnikować. Přizjewić móža so hač do pjatka, 27. junija, na farje w Chróśćicach, telefonowe čisło (03 57 96) 8 04 00. Po tym so hižo žane přizjewjenja njepríwozmu. Putnicy zetkaja so njedźelu, 29. junija, po nyšporje w Chróśćicach na farje. Za wšitkich nowačkow je tute zetkanje winowatosć. Nyšpor je w 14 hodź. Putniska Boža mša w Krupce budže srjedu, 30. julija, w 10 hodź.

Koparski turněr serbskich młodostnych

Koparski turněr dekanatneje młodžiny budže sobotu, 21. junija, w Pěskecach. Zakop je w 10.00 hodź.

Ministrantska kopańca

Tradicionalny koparski turněr serbskich ministrantow budže lětsa sobotu, 5. julija, w Pěskecach. Započatk je w 9.00 hodź. z Božej mšu we wjesnej cyrkwičce.